


**TEZAU LITURGIC**  
**7 APRILIE**

**ACATISTUL**  
**SF. CUVIOS**  
**DANIEL**  
**DE LA**  
**PERIASLAV**



**MOSCOVA, 2000**



# **Акафист**

## **святому преподобному**

### **Даниилу, Переяславскому**

### **чудотворцу**

#### **Кондак 1**

---

Избранный угодниче Божий Данииле, от юности своея крест на рамо взял еси, и по мнозех трудех и подвизех иноческих, обитель красну во славу Пресвятыя Троицы воздвиг, в ней выну по успении своем пребываеши, и наша моления к Богу возносиши; мы же, чтуще святую память твою, с верою и любовью зываем ти:

Радуйся, угодниче Божий, Данииле чудотворче.

#### **Икос 1**

---

Равноангельно житие твое преподобне, измлада показася, и был еси сосуде честен Божия благодати. Достойно блажити тя сице:

Радуйся, от юности всего себе Господеви предавай.

Радуйся, ревность многу имый, о еже чести и слушати от Божественных Писаний.

Радуйся, плоть свою со страстьми и похотьми распинавай.

Радуйся, ради Бога оставь дом свой и родители, и братию.

Радуйся, во всем волю Божию соблюдай.

Радуйся, в иноческом образе строгий подвиг благочестия показавый.

Радуйся, без воли и благословения старец иноческих ничтоже творивый.

Радуйся, яко на монастырския службы со всяким усердием текл еси.

Радуйся, яко в трудах, бдениих и пощениих непрестанно пребывал еси.

Радуйся, яко елень на источницы, к церковному пению спешивый.

Радуйся, чистоту душевную и телесную усердно хранивый.

Радуйся, яко юн сый, паче сверстник, многими добродетельми процвел еси.

Радуйся, угодниче Божий, Данииле чудотворче.

## Кондак 2

---

Видя суетное мирское житие, и слыша единого от вельмож читающа житие Симеона Дивногорца, како он смиряше похоть плоти своея, и предаше тело свое страданию, восхотел еси и сам, преподобне, подражати того житию, и пострадати такожде, якоже и той, да прославиши Бога в телеси своем, воспевая Ему: Аллилуиа.

## Икос 2

---

Разума духовнаго от юности исполнен был еси, преподобне: измлада бо поревновал еси тяжкому и многоскорбному примеру умерщвления греховныя плоти. Сего ради вопием ти:

Радуйся, зело рано вшедый в путь узкий и прискорбный.

Радуйся, иго Христова усердно понесый.

Радуйся, поста и молитвы николиже отлучивыйся.

Радуйся, неувядаемый цвете целомудрия.

Радуйся, прилежняя молитвы Богу с благоговением и страхом приносивый.

Радуйся, яко день и ночь закону Господню поучавыйся.

Радуйся, яко выну в трудех и бдениих пребываяй.

Радуйся, яко любовь нелицемерну ко всем являя еси.

Радуйся, яко о братии своея всем и во всем угождал еси.

Радуйся, всех смирению, чистоте и воздержанию научаяй.

Радуйся, сердце свое горе выну возносивый.

Радуйся, благодать священства не вотще приемый.

Радуйся, угодниче Божий, Данииле чудотворче.

### **Кондак 3**

---

Сила Вышняго осени тя, еже взяти ярем в юности твоей, но родители не домысляхуся, что есть болезнь чаду; ты же, во спасение души своея умерщвляя плоть, да угоден будеши

Богови, воспевал ему духом непрестанно:  
Аллилуиа.

### Икос 3

---

Имея всяко тщание ко всякому делу благу  
готовым быти, обхождаше преподобный  
иноческия обители, и внимаше благим обычаем  
и мудрости святых подвижников: егда же  
прииде последи во обитель Пресвятыя  
Богородицы, яже на Горицех, zde волею Божию  
водворися, не себе ради точию, но ради  
спасения многих. Чтуще подвиги преподобнаго  
Даниила, прославим его вопиюще:

Радуйся, молитвами и мудрыми словесы  
наказателю мужем и женам.

Радуйся, от многих прегрешений во отчаянии  
погруженныя, яко искусный врач, исцеливый.

Радуйся, многих от грех престати научивый,  
и к покаянию обративый.

Радуйся, безчинно ходящия в разум истины  
приводивый.

Радуйся, о всяцем страннице, и наипаче о  
поверженных на распутиих усердно  
промышлявый.

Радуйся, в дебрех измерших от мраза, и от разбойников убиенных, якоже Товит, взыскавый.

Радуйся, мертвыя поверженныя на снадение зверем, на раменах своих в скудельницу приносивый.

Радуйся, напрасною смертию почивших с великим плачем лобызавый.

Радуйся, пение над ними церковное Богу возносивый.

Радуйся, по вся дни Божественную Литургию о блаженней памяти их совершавый.

Радуйся, яко о создании церкви Божия на скудельницах ради поминовения тамо погребенных, усердно потрудился еси.

Радуйся, страннолюбче, питателю нищих, друже умерших от напрасныя смерти.

Радуйся, угодниче Божий, Данииле чудотворче.

#### **Кондак 4**

Бурю сумнительных помышлений разгоня упованием на Промысл Божий, и в нощных бдениих пребывая, исхождаше преподобный из

келлии своея, на место скудельниче смотряше; видев же над ним некая дивная знамения, умиляшеса о прославлении от Бога места того, и со слезами Ему взываше: Аллилуиа.

#### **Икос 4**

---

Слышав от Священных Писаний, яко велия есть польза душам умерших, егда приносится за них святая и страшная жертва, непрестанно моляшеса Богу и по вся дни промышляше, Данииле, имже образом устроити храм Божий на скудельницех. Темже вопием ему:

Радуйся, любовь, яже к Богу, с любовию к ближнему сочетавай.

Радуйся, равную любовь к ближним, к живым и почившим простиравай.

Радуйся, наипаче о почивших напрасною смертию прилежавый.

Радуйся, о тех, ихже имена никомуже ведомы, выну мольбы приносивый.

Радуйся, яко твердо веру имел еси в молитвы Церкви о упокоении их.

Радуйся, молитвами избавлявай их от вечныя смерти.

Радуйся, совершавый безкровныя жертвы, да вселит Господь почившыя в месте светле и покойне.

Радуйся, утешение скорбящих и плачущих о них.

Радуйся, молитвенниче о богате и убозе, нищи и страннице.

Радуйся, о всех умерших усердный рачителю.

Радуйся, угодниче Божий, Данииле чудотворче.

### **Кондак 5**

---

Яко боготечную звезду прият преподобный совет триех странных мужей, не начинати строения церковнаго ранее триех лет, да не хотение человеческо, но Божие действует изволение, и предав всего себе Богови, вопияше Ему: Аллилуиа.

### **Икос 5**

---

Видевше бояре, сущии во опале царстей, како гнев царев молитвами преподобнаго преложен бысть на милость, и яко в прежнюю честь и сан приведени быша, дивляхуся о силе молитв его, и зываху:

Радуйся, во плоти ангеле Божий, благую вестъ подавая в печали сущим.

Радуйся, молитвами своими утоляй гнев царев.

Радуйся, сильный ходатаю и верный молитвенниче.

Радуйся, Христово благоухание, тайно веселящее скорбная сердца.

Радуйся, благодворяй всем, и ничтоже за то требуй.

Радуйся, туне приемый дары Духа Святаго, и туне их раздавая.

Радуйся, богатая стяжавый нищетою духа.

Радуйся, ни во что себе вменяяй, но всегда во всем славу Богу воздавая.

Радуйся, благовременне и безвременне научавый веровати в Бога, и соблюдать заповеди Его.

Радуйся, души ближних к единому на потребу обращаая.

Радуйся, и в скорби, и в радости сущих к покаянию приводяй.

Радуйся, от сея жизни к вечному животу всех устремляй.

Радуйся, угодниче Божий, Данииле чудотворче.

### **Кондак 6**

---

Проповедницы силы молитв святого угодника, бояре обещахуся исполнити желание сердца его, и о поставлении церкви на скудельнице умолити самодержца и первосвятителя, да поется на сем месте надгробная песнь: Аллилуиа.

### **Икос 6**

---

Возсия новый свет желанию преподобного, егда обещахуся бояре промыслити еже о церковнем здании: последи же и сам востече к царствующему граду, и испроси грамоту цареву, во еже строити нову церковь. Сего ради вопием:

Радуйся, яко о церкви Божией усердно печашеся.

Радуйся, яко и за немощию плоти не оставляше дела богоугодного.

Радуйся, яко с радостию ради того совершаше трудное шествие к царствующему граду.

Радуйся, яко и пред лицом царя о блазе и спасении усопших промышляше.

Радуйся, яко и пред первосвятителем Церкви Российския едино попечение имеаше, еже о церковнем здании.

Радуйся, яко и благословение первосвятителя, и повеление царево приял еси со смиренномудрием.

Радуйся, яко ничтоже имея к созданию церкви, подвигся еси к оному во уповании точию на Бога.

Радуйся, яко отец о чадах промышлявый о умерших.

Радуйся, ревностный молитвенниче о тех, иже имена забвени быша.

Радуйся, явивыйся просветителем места того, идеже они положени быша.

Радуйся, радование умерших.

Радуйся, утешение и отрадо живущих на земли.

Радуйся, угодниче Божий, Данииле чудотворче.

### **Кондак 7**

---

Хотящу преподобному изыскати место, на немже строити церковь, узре его жена, плачуци по родителех и сродницех своих, иже бяху положени на скудельницех, и сребреницы давши ему, моляше, да сотворит память о них; разумев же преподобный, яко от Господа бысть начинание сие, вопияше Ему: Аллилуиа.

### **Икос 7**

---

Новое чудо слыша преподобный от рыболова, како той многажды виде со езера над скудельницами овогда свет в нощи светящийся, овогда же свечи многи горяцы, удивися Божию промыслению. Мы же, чудо слышаще, вопием:

Радуйся, Промыслом Божиим управляемый.

Радуйся, сподобивыйся чудных видений, яже о церкви Божией.

Радуйся, егоже желание исполняет Бог.

Радуйся, в устроении церкви обрадованный Божиим соизволением.

Радуйся, во всем повинуйся воли Божией.

Радуйся, всякое благо на пользу приемляй, благодаря Бога.

Радуйся, с любовью твояй поминавание усопших по прошению живущих.

Радуйся, не ищай мзды, моляся о них, ревнуя точию о спасении их.

Радуйся, не имый больши радости, еже творити и слышати в церкви поминавание усопших.

Радуйся, споспешествуяй спасению живых и вечному упокоению умерших.

Радуйся, иже друг бяше и zde пребывающым, и отшедшым отсюда.

Радуйся, живыя и умершыя в сердце своем вмещаяй.

Радуйся, угодниче Божий, Данииле чудотворче.

### **Кондак 8**

---

Странное видение воин некий поведает преподобному: яко егда спешити ему на торжище до утренняго света, слыша на скудельницах яко шум пения некоего;

преподобный же познав, яко Пресвятая Троица благословляет желание сердца его, со слезами вопияше песнь: Аллилуиа.

### **Икос 8**

---

Во вся оружия Божия облекись, яко возмощи стати противу кознем дьявольским, со всяким смиренномудрием приступи к созданию церкви Божия на скудельницах. Мы же, церковь славу видяще, возопиим:

Радуйся, крестным знаменем и именем Христовым бесов прогонявый.

Радуйся, вражия коварства разрушавый.

Радуйся, церковь во имя Всех Святых устройый, да имена погребенных на скудельницах поминаются.

Радуйся, церковь во имя Похвалы Пречистыя Богородицы воздвигнувый, яко Ея ходатайством помощь Божия к тебе прииде.

Радуйся, в память триех видений и триех первых жертв, храм во славу Пресвятыя Троицы создавый.

Радуйся, не по своему хотению, но по воли Божией обитель иноческу устройый.

Радуйся, яко добрый пастырь, пекийся о устроенней обители.

Радуйся, строгий блюстителю чина богослужебнаго, и иноческих уставов.

Радуйся, иже подвизавыйся в непрестанных трудах, блага ради обители.

Радуйся, иже оскорбления и гонения с радостию претерпевый, и о ненавидящих молитву творивый, да укротит Бог сердца их.

Радуйся, иже братию в монастырстей скудости утешавый, и ко упованию на Промысл Божий возбуждавый.

Радуйся, во время смущения душевнаго советов матере своея послушавый, подавая чадом образ послушания своим родителем.

Радуйся, угодниче Божий, Данииле чудотворче.

### **Кондак 9**

---

Всякое попечение прилагая о устроенней обители, утешен бысть преподобный видениями двух старцев тоя обители, иже видеша в нощех множество свещей светящихся, и множество священнаго чина людей, поющих и кадящих. Он же сия слышав, прослави Бога, вопия: Аллилуиа.

## Икос 9

Витии многовещаннии не возмогут воспети всех дел твоих, преподобне: ибо, старец сый, о обители вельми печашеся, и мирским людем подаяше вся, яже на пользу душевную; но елико есть произволение, даждь нам воспевати тебе:

Радуйся, о обители своей и о упокоении братии неусыпный попечителю.

Радуйся, яко болий сый, бяше всем слуга и раб смиренномудрый.

Радуйся, яко немощи других нося, на немощных не возлагал еси бремене неудобоносимаго.

Радуйся, старцев благолепие, и иереев благочиние.

Радуйся, иноков, старостию одержимых, умиление.

Радуйся, избыточествуяй в богатство простоты сердца своего.

Радуйся, егоже беседы в сладость послушаша бояре и князи.

Радуйся, восприемниче от святыя купели сына царева.

Радуйся, добрый кормителю всех алчущих во время глада.

Радуйся, молитву церковную учивый творити со страхом.

Радуйся, ведый тайная деяния людей и обличавый их на исправление.

Радуйся, проповедниче бессмертия и наследия живота вечнаго.

Радуйся, угодниче Божий, Данииле чудотворче.

### **Кондак 10**

---

Спасение себе содевая, спасаше преподобный Даниил и братию свою, и всех приходящих к нему, словом, житием непорочным, любовию, верою, чистотою, да вси прославят Бога, и вопиют Ему: Аллилуиа.

### **Икос 10**

---

Стена был еси, преподобне, всем скорбным и нападваемым, призывающим тебе в помощь: ибо Небесе и земли Бог показа тя храм Духа Святаго, да научимся возглашати тебе:

Радуйся, верный наставниче иночествующих, и помощниче им во всякой нужде душевной яже ко спасению.

Радуйся, молитвами своими отгоняяй козни вражия, смущающыя иноков в житии благочестнем.

Радуйся, молитвами своими и благословением простыя снеди в сладостныя претворявый.

Радуйся, яко друг царев, повинных от смерти свободявый.

Радуйся, путьшествующих от напрасныя смерти избавляяй.

Радуйся, устрашение разбойников, иже молитвами твоими, яко воинством отгоними беша.

Радуйся, врачу неисцельных болезней.

Радуйся, исцеление подаваяй в скорби и тузе душевной.

Радуйся, радость родителем подаваяй исцелением чад их от болезней.

Радуйся, радость чадом подаваяй исцелением болящих родителей их.

Радуйся, скорое заступление обидимых.

Радуйся, утешение боящихся часа смертного.

Радуйся, угодниче Божий, Данииле чудотворче.

### **Кондак 11**

---

Пение хвалебное приносим ти, преподобне, но скудными песнями хвалим тя: яко аще отрочество твое, аще юность, аще старость, вся исполнена суть дел благих и любви, яже к Богу и ближнему, вся вещают едину песнь Богови: Аллилуиа.

### **Икос 11**

---

Светоприемную свещу зрим тебе, преподобне, сияющую лучами Божия благодати, аще и крепость твоя оскуде, и исчезаше тебе свет временная жизни сея: твоим бо промышлением открыты беша святая мощи благоверного князя Андреа. Сего ради радуясь вопием:

Радуйся, усердный чтителю Бога, дивнаго во святых Своих.

Радуйся, распространение Царствия Божия благодати.

Радуйся, прославление святых.

Радуйся, яко гром устрашай искушающих  
Духа Святаго.

Радуйся, обличителю сумнительных  
помыслений.

Радуйся, из неверия в веру несумненну  
приводяй.

Радуйся, и в старости добрей прежде всех на  
церковное пение приходивый.

Радуйся, до конца жизни своея наставляяй  
соблюдати божественныя заповеди и предания  
святых отец.

Радуйся, до последняго часа смертнаго  
попечение о немощных, нищих и странных  
имевый.

Радуйся, даров благодати Божией обилие.

Радуйся, яко и по скончании своем, обещахся  
еси никогдаже отлучен быти от обители своея.

Радуйся, проповедниче Божия благодати, яже  
имать во веки быти во обители.

Радуйся, угодниче Божий, Данииле  
чудотворче.

## Кондак 12

---

Благодать Божию зряще в честных и многоцелебных мощех преподобнаго, прославим вернии Бога, дивнаго во святых, и возопиим Ему: Аллилуиа.

## Икос 12

---

Поюще честное житие преподобнаго, прославим и та чудная дела, яже соверши по скончании своем, и яже от честных мощей его даровася:

Радуйся, и по преставлении своем многим людям на пользу являйся.

Радуйся, молитвами своими споборствуяй царю Иоанну на покорение града Казани державе Российстей.

Радуйся, подаваяй исцеление от болезней чтущим святыха мощи твоя.

Радуйся, исцеляяй пиющих с верою воду от кладезя, егоже ископал еси рукама своима.

Радуйся, здравие болящим отроком подаваяй.

Радуйся, от болезней лютыха огневицы и трясавицы избавляяй.

Радуйся, спасавай бесноватых от гибели, и смысла им подавай.

Радуйся, являйся забывшим данья Богу обеты, и к исполнению их побуждай.

Радуйся, помощь и силу подавай служителем и пастырем Церкви.

Радуйся, угодниче Божий, Данииле чудотворче.

### **Кондак 13**

---

О пречудный и преславный угодниче Божий, преподобне Данииле, прими ныне сие малое моление наше, и якоже обещался, призирай милостивно с высоты небесныя славы на обитель твою и молящихся в ней, да вси в нынешнем веце проживем во славу Пресвятыя Троицы, и в будущем купно с тобою, откровенным лицом Славу Господню узревше, воспеваем во веки Богу: Аллилуиа.

*Этот Кондак читается трижды, затем Икос 1-й и Кондак 1-й*

### **Молитва**

---

О, преподобне и богоносне отче наш Данииле, всемирно к тебе припадаем и тебе молимся:

не отступи от нас духом твоим, но всегда поминай нас во святых и благоприятных молитвах твоих ко Господу нашему Иисусу Христу; молися Ему, да не потопит нас бездна греховная, и да не будем врагом, ненавидящим нас, в радование; да простит Христос Бог наш твоим предстательством за нас вся согрешения наша, и Своею благодатию водворит посреде нас единопущие и любовь, и да избавит нас от козней и наветов дьявольских, от глада, губительства, огня, всякия скорби и нужды, от болезней душевных и телесных и от внезапныя смерти; да сподобит Он нас, притекающих к раце мощей твоих, в истинней вере и покаянии пожити, христианския, непостыдныя и мирныя кончины жития нашего достигнути, и наследовати Царство Небесное, и славити пресвятое имя Его со Безначальным Отцем и Пресвятым Духом во веки веков. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
НЕБО**